

1 John

Pipe arrekwenye John-elarle intelhe-ileke Ngkarte-kenhe areyeke

Angkentyele itethe antheme akerte

¹ The kwenhe pipe nhenhe intelhe-ileme tyerrtye-akerte nhenge anwerne-arle renhe Angkentye akeme nhenge itethe-arle antheme, nhenhe kwenhe Angkentye itethe-arle aneme. Lyetenyenge akwele, urreke apmerekere ahelhe nhenhe anetyenhenge, Angkentye nhenhe re kwenhe itethe akwete aneke. Nhenge re ahelhe nhenhe-werne apetyemele, anwerne anteme renhe arratyekere areke. Nhenge re akaltyele-antherlenge anwerne renhe aweke angkerlenge. Anwerne renhe arratyekere anpeke.

² Itethe anthentye akngerre re arrateke! Alknger anwerne-kenhe anthurrele areke re arratekenge. Lyete anteme anwerne nhenge arrekankerre ileme utnenge itethe nhenhe ikwere-akerte nhenge-arle akwete-ante-arle anemeke. Arrekwele-arle re Anyikwenge anetyarte, re akenhe ahelhe nhenhe-werne apetyeke anwernekenge anerle-anetyeke.

³ Kele areke-arle-iperrele ante aweke-arle-iperrele anwerne kwenhe arrekankerre ileme, nhenge yanhe-ngentyele apeke arrankerre anwernekenge anyente-irremele anetyenhenge

akangkemele-anteme aneme Ngkartenge uthene Alere Ikwerenhenge Jesus Christ-nge uthene.

⁴ Ye, the kwenhe arrekatherre intelhe-ileme arne nhenhe areye-akerte nhenge yanhe-ngentyele anwerne arratye akangkemele anthurre anetyeke arrantherre-arle kwenhe it-nenhe arratye itelarekenge.

Ngkarte ure alkngenthe-arteke

⁵ Angkentye yanhe anwerne-arle aweke Christ-ngentyele, anwerne arrekatherre ilemele alakenhe; Ngkarte kwenhe impene anthurre aneme. Re arne akurne apekele mpwaretyakenhele aneke. Re alkngenthe alkarle anthurre ingwemerte-kwenye-arle.

⁶ Anwerne apeke alakenhe angkeme-ketye, “Anwerne kwenhe akangkemele Ngkartenge apurte aneme.” Kenhe nhenge anwerne akwetethe arne akurne mpwarerlte-anerlenge, anwerne kwenhe ingwemertele-arteke aneme, anwerne urrtiyirremele nhenge-arle akwele anwerne akangkemele Ngkartenge apurte aneme. ⁷ Kele anwerne apeke arratye mwerre anerlte-aneme, nhenge Ngkarte-arle arratye mwerrentye anthurre aneme-arteke, yanhe kwenhe alkngenthe Ngkarte-kenhenge aneme-arteke. Nhenge anwerne anemele alkngenthe alakenhe-artekenge anwerne arratye mwerrele anetyenhe ante anwerne akangkemele anemele, ipeltye anemele. Nhenge anwerne apeke arne akurne mpwaremele Ngkartele akenhe anwernenhe arlknge-me-anteye-arle alhwe Jesus-kenhele.

8 Nhenge anwerne apeke angkerleng
anwerne kwenhe-arle arne akurne
mpwaretyakenhe kele anwerneke urrtye
ilelheme ware-arle. Nhenge anwerne alakenhe
angkemele, anwerne kwenhe angkeme anwerne-
arle arratye itelaretyakenhe nhenge iwenhe-arle
Ngkarte anwerne-akerte angkeme arratye-arle
anemeke. 9 Ngkartele kwenhe mpwareme
nhenge iwenhe-arle re ilemeke re imerte
mpwaremele, iwenhe-arle re mpwareme
kwenhe arratye anthurre-arle. Alakenhe
ikwerenge anteme nhenge anwerne apeke
Ngkarteke ilelheme nhenge arne akurne areye
anwerne-arle mpwareke, kele Re-anteme
anwernenhe arlkgeme arne akurne yanhe
areye anwerne-ngentyele imerte anwernenge
ipeltye-anteme-irremele ante anwernenhe
imerte akayake-ilemele nhenge arrilentye-
ketyenge. Kele anwerne kwenhe akwetethe
nhenge Ngkarteke ilelhetyeke nhenge anwerne
apeke arne akurne iwenhe apeke renhe
mpwarerleng. 10 Ngkarte kwenhe angkeme
ingkirreke anthurrele arne akurne mpwareke.
Alakenhe ikwerenge anteme nhenge angwenhe
apeke angkeme rarle akwele arne akurne
mpwaretyakenhe, rarle angkeme Ngkarte-arle
urrtiyirremele angketyame-arteke akwele! Re
ipmentye-iweme-arteke-arle nhenge iwenhe-
arle Ngkarte anwerne-akerte angkeme!

2

Christ-arle Ngkarteke angkeme anwerneke

¹ Ye, ampe areyaye, the kwenhe angkentye nhenhe arrekatherre intelhe-ileme, nhenge aweke-arle-iperrele arrantherre mwerrentye anerlte-anetyenhenge arne akurne mpwaretyakenhele. Kenhe arrantherre apeke arne akurne mpwarerlenghe nhenhe itelaretyeke, Jesus Christ-arle Akngeyeke angkeme anwerneke. Jesus Christ-ele anwernenhe itetheke mpwareme, re akwetethe arratyentye anthurre anerle-aneme. Re Ngkarteke angkeme Rarle anwernenhe ipeltye-ilirtneme. ² Itelareme Jesus Christ-arle utnenge ikwerenhe-arrpe anthelheke anwerneke piwelhemele ilweke, nhenge Ngkarteke anteme arne akurne areye anwerne-ngentyele urrparyenhenge, anwernenhe ilpernetyakenhe anemele. Ye, Re kwenhe arlkgeme arne akurne areye nhenge anwerne-arle mpwareke, Re arlkgeme-anteye arne akurne areye tyerrtye areye-ngentyele apmere ahelhe arrpe-anenhele-arle!

³ Nhenge anwerne apeke Ngkarte aywerrkele aweme ingkirreke mpwaremele, Rarle anwernenhe mpwaretyeke ileme kele imerte anwerne-arrpe itirremele, "Arraty kwenhe anwerne Renhe itelaremere." ⁴ Nhenge angwenhe apeke re alakenhe angkeme-ketye, "The kwenhe Renhe itelareme." Kenhe tyerrtye yanhe apeke aywerrkele awetyakenhele iwenhe-arle Ngkarteke anwernenhe mpwaretyeke ileme kele rarle urtyirremele angkeme rarle Ngkarte itelaremele. Yanhe kwenhe arraty anetyakenhe anemere. ⁵ Kele nhenge angwenhele apeke re Ngkarte aywerrkele apeke awerlenghe imerte mpwaremele

arne iwenhe-arle Re anwernenhe mpwaretyeke ileme kele re-anteme Ngkarteke ahentye anthurre aneme. Ye, nhenhe-ngentyele kwenhe anwerne akaltye aneme anwerne-arle arraty atyewe areye Ikwerenhe aneme, Rarle anwernekenge aneme. ⁶ Anwerne apeke ilelherleng atyewe Ngkarte-kenhe areye anwerne kwenhe Jesus Christ-arle aneke-arteke anetyeke.

Angkentye lyetenye Christ-ngentyele

⁷ Atyewe areye, the kwenhe nhenhe arrekanttherre intelhe-ileme ante the arrenhantherrenhe ileme akangkelhe-ilerretyeke. Angkentye nhenhe alkarle kwenye-arle, angkentye nhenhe ingkweye kwenhe. Arrantherre kwenhe arrekwele aweke-arle. Angkentye arrekwenye kwenhe arrantherre-arle aweke nhenge Christ arraty itelaremele. ⁸ Kenhe angkentye nhenhe akenhe tharle arrekanttherre ileme kwenhe arraty angkentye alkarle lyetenye anemenge. Angkentye alkarle aneme iwenhe-arle Christ-ele mpwarekenge alkarle anemenge, ante iwenhe-arle arrantherre mpwareme alkarle aneme. Lyete arrantherre arne akurne-ketye mpwarenty impelheke, arrantherre anteme arne mwerre areye arraty areye-arle mpwarerlte-aneme-tetye. Alakenhe-arteke kwenhe arrantherre nhenge awethe ingwemertele anetyakenhe. Alakenhe-arteke-arle arrantherre nhenge alkngenthe akngerrele anemeke nhenge alkngenthe akngerre kele pwarntyeme.

⁹ Angwenhe apeke re angkeme-ketye, “Ayenge kwenhe itethe alkarle anthurre aneme, tyerrye-

arteke alkngenthele aneme Ngkarte-ngentyele pwarrrtyemenge.” Kenhe ikwerenge-anteye-arle, tyerrtye yanhe arrpenhe Jesus-kenheke ahentye anetyakenhe, kele re itethe alkarle anetyakenhe, re akenhe nhenge tyerrtye arrpenhe-arteke-arle nhenge akwetethe ingwemertele anerle-anemenge. ¹⁰ Nhenge anwerne apeke akangkemele aneme arrpenhe areyeke, itnenhe mwantyele arntarnte-aremele, anwerne kwenhe alkngenthele akwetethenhe anerlte-anemele ante anwerne Ngkarte akangketyeke mpwareme. Nhenge anwerne alkngenthele alakenhe-arteke anemele anwerne atyewe arrpenhe Jesus-kenhe tyelpelhe-ilettyakenhe itnyeketye. ¹¹ Kenhe nhenge anwerne atyewe Jesus-kenhe areyeke ahentye anetyakenhe kele anwerne iwerre arrpenhe akurne-arle anemele tyerrtye apeke ingwemertele aneme-arteke. Nhenge arrpenhe ingwemertele itnyelpitnyeme-arteke, alkng pwenge-artekele anteme aneme, alakenhe-arteke. Anwerne itelaretye-kwenye nthenhe-werne alhemele.

¹² Ye, the kwenhe pipe nhenhe arrekanttherre intelhe-ileme nhenge ayenge-arle ahentye-anemeke nhenge arranttherre-arle ampe atyinhe-arteke anemeke. Arranttherre apeke arne akurne areye mpwaremele Ngkarte-arle arrekanttherenge ipeltye-irrekenge Christ-enge ularre. ¹³ Artwe ampwe areye uthene arelhe ampwe areye uthene, pipe nhenhenge the kwenhe arrekanttherre-arlike ileme arranttherre-arle Christ arratyte itelarekenge nhenge arrekwele-arle anekeke. Arlwekere-arenye

areye-arlike artwe anewe anetyakenhe areye-arlike, Ngkartele kwenhe arrenhantherrenhe lterrke mpwareme nhege arrentye Satan-ele apeke arrenhantherrenhe arrkerneme, arrantherre renhe akwenpele aweme.

¹⁴ Ayenge awethe nhenhe angkeme: The kwenhe arrekatherre nhenhe intelhe-ileke arrantherre-arle kwenhe Ngkartearle itelarekenge, arrantherre-arle Christ-arlike itelarekenge, nhege akwetethe-arle itethe anetyarte, arrantherre-arle akwetethe utnenge atnerre anerlenge. Arrantherre-arle kwenhe akwetethe aywerrke anthurrele awerlte-anemenge angkentye Ngkartekenhe, arrantherre-arle nhege arrentye Satan irlpe artepele awerlenge nhege rarle arrenhantherrenhe arrkernemenge nhege apale mpwareketye.

¹⁵ Arrantherre arelhewarraye! Arne arrpeanenhe arratyte itelaretyale anaye arne yanhe kwenhe apmere ahelhe nhenhe-arenye-arle aneme. Tyerrtye arrpenheme arne areye apmere ahelhe nhenhe-arenye areyeke ware itirrerlte-aneme, itnekenge apurte anetyale. Nhege arrantherre apeke itnekenge apurte aneme, arrantherre-arle Ngkarteke ahentye anetyakenhe anemere. ¹⁶ Yanhe areye arne apmere ahelhe nhenhe-arenye areyeke-arle ware itirrerlte-aneme akwetethe alakenhe mpwareme: itne kwenhe mpwarerlte-aneme iwenhe apeke ikwere itne-arle ahentye anemearle ware, itne interlte-apeme anewe tyerrtye arrpenhe-kenhege. Alakenhe-arlike itne

kwenhe arne arrpe-anenheke ahentye anerlte-aneme. Alakenhe-arlike itne kwenhe akwetethe tnakelhemele itneke-arrpe itirrerlte-aneme. Kenhe Ngkartele akenhe itnenhe alakenhe anetyeke akaltyele-anthetyakenhe. Itne aneme tyerrtye ahelhe nhenhe-arenye areye-arteke Ngkartele akutne areye-arle. ¹⁷ Urreke kwenhe apmerek ahelhe nhenhe uyerretyenhe. Arne ingkirreke ahelhe nhenhe-arenye areye-arlike, tyerrtye areye nhenge ahentye-anemeke, itne kwenhe uyerretyenhe-anteye. Kenhe yanhe areyele mwantyele awerlte-arle-aneme nhenge aywerrkele mpwarerlte-anemele-arlike nhenge Ngkartele-arle itneke mpwaretyeke ahentye anemeke itethe akwete-ante anetyenhe.

Tyerrtye arrpenheme Christ-eke akwetethe ahentye-anetyakenhe

¹⁸ Ye, ampe atyinhe areyaye, Christ kwenhe lyete ware apetye-alpetyenhe ahelhe uthene alkere uthene uyerretyenhe-arle. Kenhe arrantherre akenhe anwerne-ngentyele kele aweke-arle, nhenge tyerrtye anyente Christ-eke ahentye anetyakenhe-arle kwenhe arrateme, anyente-ante ware kwenye, atningke kwenhe arrateke-arle anteye. Kele itne akenhe kele-arle apmerek ingkirreke anthurrenge arrateke ante tyerrtye atningke kele aneme Christ-eke ahentye anetyakenhe nhenge artepe-arle ikwerenge untyeme-irrereke. Alakenhe ikwerenge anteme anwerne akaltye aneme arlte ingkerne-arle itwe-irremenge. ¹⁹ Tyerrtye nhenge areye tyatye anwerne-kenhe-nge untyeme-irreke, itne akenhe

anwerne-kenhe-nge arraty anetyakenhe. Nhenge itne apeke-arle atyewe Christ-kenhe areye aneke itne-arle anwernekenge anemere, arrangkwe-arle, itne impemele-arle alheke. Itne-arle anwernenhe impemele alhekenge, ingkirrekele kwenhe itelareme arrangkwe-arle itnekenge anwerne-kenhe anemeke.

²⁰ Arrantherre kwenhe itne-arteke anetyakenhe, Christ-ele-arle Utnenge Akngerre arrekanttherre-werne yernekenge, Re arrekanttherre irrpeke arrekanttherrenge-arlenge anemele. Yanhe-ngentyele arrantherre ingkirrekele angkentye arratyentye itelareme.

²¹ Arrantherre apeke itirreme tharle arrekanttherre pipe intelhe-ilemeke-athene arrantherre-arle angkentye arratyentyeke akutne anerlenge. Arrangkwe-arle akenhe, arrantherre kwenhe kele akaltye aneme, the anteme pipe nhenhe intelhe-ileme arrantherre-arle kele akaltye anemenge. Arrantherre akaltye aneme tyerrtye angwenhe apeke-arle angkentye arraty angketyenhe re kwenhe angkentye urrtiyirrentye uyarne apurtelhe-iletienhe nhenge angkentye arratyenge, angkentye arraty anthurre-ante-arle kwenhe Ngkarte-ngentyele apetyemenge.

²² Angwenhe-ame nhenge aneme angkentye urrtiyirrentye-arle ilerle-aneme? Kele yanhe kwenhe aneme nhenge angkeme-arle Ngkartele-arle akwele Jesus yernetyakenhe. Tyerrtye yanhe re kwenhe Christ-eke ahentye anthurre anetyakenhe aneme, re ikerltele angketyakenhe Ngkarte-arle Akngeye aneme, ante Jesus-arle

Alere Ikwerenhe aneme. ²³ Kenhe angwenhele apeke Jesus ipmentye-iweme nhenge angkemele nhenge rarle Alere Ngkarte-kenhe anetyakenhe, kele re Akngeye ipmentye-iwemele anteye re Ikwere akutne anemele. Kele nhenge angwenhe apeke angkerleng nhenge Jesus-arle Alere Akngeye-kenhe aneme, kele re anteme Akngeyeke akaltye aneme, Ikwerenge anyente aneme anteye.

²⁴ Ye, ayeye mwerreke akwetethe itirrewarraye nhenge arrantherre-arle awekeke-amparre arrantherre Jesus arratye itelaremele, ikwere itirreke-arle-iperrele arrantherre Alerenge uthene Akngeyenge uthene akwete-ante apurte-irretyenhenge. ²⁵ Christ-ele anwernenhe arrekwele alhileke anwerne-arle Ikwerenge anyente-irretyenhenge itethe-arle akwete-ante anetyenhe.

²⁶ The arrekantherre nhenhe intelhe-ileke nhenge arrenhantherrenhe alkngarre-ilemele yanhe areye-akerte nhenge arrekantherre urrtiyirretyeke ahentye aneme-arle angkentye arratye-akerte Christ-kenhe. Kele itnenhe akwenpele awaye, itnenhe arratye itelaretyale.

²⁷ Christ-ele kwenhe Utmenge Ikwerenhe arrerneke utmenge arrekantherrele-arleng. Kele arrantherre anteme akwetethe Utmenge Ikwerenhe atnyenerlte-aneme. Alakenhe ikwerenge anteme arrantherre arrpenheke ahentye-anetyakenhe nhenge arrenhantherrenhe arne arrpenhe areye akaltyele-anthetyeke angwenhe apeke angkemenge arratye akwele aneme-arle. Utmenge Ngkarte-kenhele kwenhe

arrenhantherrenhe akaltyele-antherle-aneme ingkirreke arrantherre itelareme akaltye anthurre anetyenhenge angkentye Ngkarte-kenhe-akerte. Utmenge Ngkarte-kenhe kwenhe akwetethe arraty aneme Re arrenhantherrenhe akaltyele-antherle-aneme arne arrpe-anenheke. Alakenhe ikwerenge anteme, iwerre arratyale anerlte-anaye Utmenge Ngkarte-kenhele arrenhantherrenhe kele akaltyele-antheke-arle.

²⁸ Ye, apurte akwete anerlte-anaye Christ-enge nhege re apetyalperlenge nhege arlte ingkernenge anwerne-arle utmenge atnerre-arle atnyenetyenhe anwerne apure anetyakenhe anetyenhe nhege Christ-enge arrekwele nhege re apetyerlenge.

²⁹ Kele arrantherre itelareme Ngkarte-ingarle iwenhe apeke arraty renhe akwetethe mpwarerle-aneme, arrantherre itelareme-anteye angwenhele apeke re akwetethe arne arraty apeke mpwarerle-anerlenge tyerrtye nhege Ngkarte-kenhe altye-irreke-arle.

3

Ayeye ampe Ngkarte-kenhe areye-akerte

¹ Ye, nhenhe kwenhe mwerre anthurre aneme Ngkarte-arle anwerneke akangkemele aneme, anwernenhe ampe Ikwerenhe areye ileme ante anwernenhe mwantyele arntarntearemele. Kele anwerne kwenhe arraty ampe ikwerenhe areye aneme. Kenhe yanhe areyele nhege Ngkarte arraty itelaretyakenhe areyele ante arne apmere ahelhe nhenhe-arenye areye wareke itirrerte-anemele itne kwenhe

anwernenhe uyarne itelaremele, itne Ngkarte uyarne itelaremele Ikwerenge artepe untyeme-irremele aneme. Alakenhe-anteye-arle itne uyarne itelareme anwerne-arle ampe Ngkarte-kenhe areye anemeke. ² Atyewe atyinhe areyaye, anwerne kwenhe lyete ampe Ngkarte-kenhe areye aneme, kenhe urreke-arteye anwernenhe nthakenhe anteme irretenhe? Nhenhe araye, anwerne akutne aneme Ngkartele-arle anwerneke iletakenhenge. Anwerne kwenhe angkentye anyente nhenheke ware akaltye aneme, urreke nhenge Christ apetyalperlange anwerne re-arteke antemele anetyenhe nhenge anwerne alknge arerrerrange. ³ Alakenhe ikwerenge anteme anwerne akwetethe itirrerlte-anetyeke nhenge Christ-arteke irretenhe. Nhenge urreke anwerne-arle apmere ahelhe nhenhele akarelhemele, anwerne arratye-ante anetyeke arrkernemele, arne ahelhe nhenhe-arenhe ingkirreke-ketyenge akalke-akalke anetyeke, nhenge Christ-arle anetyarte-arteke.

⁴ Nhenge tyerrtyele apeke arne akurne mpwaremele re kwenhe ayene-ilelhemele mpwaretyeke iwenhe-arle angkentye Ngkarte-kenhele mpwaretyeke ileme, arne akurne-arle mpwaremenge kwenhe alakenhe-anteye aneme nhenge ayene-arle-ilelheme nhenge iwenhe-arle angkentye Ngkarte-kenhele mpwaretyeke ileme. ⁵ Nhenge Christ apetyeke anwerneke ilwetyeke, anwernenhe ilpernetyakenhe aneme arne akurne areye anwerne-arle mpwarekenge. Arrantherre itelareme Christ-ele-arle arne akurne mpwaretyakenhe anetyarte. ⁶ Nhenge tyer-

ryte apeke apurte akwete Christ-nge anemele rarle akurne ingkirreke-ketye untyeme-irreke-arle. Kenhe nhenge angwenhele apeke re akwetethe arne akurne mpwarerlenge tyerrtye yanhe re kwenhe Christ itelaretyakenhe, Ikwere akutne anemele.

⁷ Ampe atyinhe areye, tyerrtye arrpenhe areyele kwenhe arne akurne akwetethe mpwarerlte-aneme, ayeye ilelhemele itne-arle akwele mwerre aneme nhenge iwerre arratyale. Itnenhe awetyale anaye itne kwenhe urrtyrremele ware angkerlte-aneme. Kenhe nhenge tyerrtye apeke arratyale mwerre anerle-aneme, tyerrtye yanhe re kwenhe arratyale Christ-arteke aneme. ⁸ Kenhe yanhe areye arne akurne akwetethe mpwarerlte-aneme kwenhe arrentye Satan-kenhe, arrentye Satan-ele-arle kwenhe arne akurne mpwarekele nhenge arlte arrekwelenge akwete, ante itne mpwareme rarle nhenge mpwareke-arteke. Nhenge Alere Ngkarte-kenhe-ingarle apetyeke nhenge arne akurne ingkirreke uyerrelhe-ilettyeke arrentye Satan-ele-arle mpwareke.

⁹ Nhenge tyerrtye apeke-arle Ngkarte-kenhe aneme re akwetethe arne akurne mpwaretyakenhe anerle-aneme Ngkarte-arle kwenhe ikwere kwenele anemele renhe Utnenge Ikwerenhe antheme. Tyerrtye yanhe arne akurne mpwaretyeke ahentye anetyakenhe rarle ampe Ngkarte-kenhe anemenge. ¹⁰ Ye, nhenhe-ngentyele anwerne kwenhe alhengke-areme nhenge angwenhe-arle nhenge ampe Ngkarte-kenhe aneme ante angwenhe-arle

ampe arrentye Satan-kenhe anemeke, ampe Satan-kenhe areyele-arle kwenhe arne arratye mpwaretyakenhe, itne nhenge mwerrentye anerlte-anetyakenhe. Tyerrtye areyele-arle arne akurne nhenhe areye mpwarerlte-anemele kwenhe ampe Ngkarte-kenhe areye anetyakenhe.

Arrantherre akangkelhe-ilerretyeke arntarnte-arerremele anaye

¹¹ Angkentye nhenge arrantherre-arle aweke-iperrele nhenge Christ arrekwele arratye itelarekele alakenhe kwenhe aneme; anwerne akangkelhe-ilerretyeke anaye, mwerre anerlte-anemele atyewe Ngkarte-kenhe ingkirrekenge.

¹² Artwe nhenge Cain-arteke anetyalaye arrentye Satan-kenhe kwenhe re, re atyeye ikwerenhe irrerlknge atweke. Iwenhenge-ame Cain-ele renhe irrerlknge atweke? Cain-ele arne akurne mpwaretyarte nhenge re aremele atyeye ikw-erenhele arne mwerre mpwarerlunge, re anteme renhe irrerlknge atweke.

¹³ Atyewe atyinhe areye awerrirraye, atnulketyalaye nhenge tyerrtye Christ-arle arratye itelaretyakenhe areye arrekantherre ahentye anetyakenhele. ¹⁴ Anwerne kwenhe itne-arteke anetyakenhe, anwerne kwenhe akaltye aneme anwerne-arle arrpenhe anemeke anwerne-arle kwenhe arrpenhe areyeke akwetethe akangkemele aneme, atyewe Ngkarte-kenhe ingkirrekenge ipeltye-irrekarle.

Urreke Ngkartele anwernenhe akngarte-
iwetyenhenge, anwerne-arle irrerlknge-werne-
atheke anetyarte. Lyete anteme, Re anwernenhe
itetheke mpwareke anwerne iwerre arratyete
alheme iwerre nhengele itethe-werne-atheke.
Kenhe yanhe areye akenhe nhenge Ngkartele-
kenhe anetyakenhe areye kwenhe akangkelhe-
ilerretyakenhe, itne kwenhe iwerre akurne-
werne ware alheme nhenge irrerlknge-werne-
atheke.

¹⁵ Nhenge angwenhe apeke arrpenhe Jesus-
kenheke ahentye anetyakenhe aneme, re
kwenhe tyerrtye irrerlknge atwentye akngerre-
arteke aneme. Arrantherre itelareme, tyerrtye
nhenge irrerlknge atwentye akngerre-arle
itethe akwete-ante anetyakenhe aneme apurte
Ngkartenge.

¹⁶ Anwerne kwenhe akaltye
aneme nhenge nthakenhe-arle arrpenhe
areyeke akangkemele anetyeke, nthakenhe-
arle arrpenhe areyenge ipeltye-irretyeke
Christ-arle kwenhe utnenge ikwerenhe-arrpe
anthelheke anwerneke piwelhemele ilweke.
Alakenhe ikwerenge anteme anwerne itethe
anwerne-kenhe anthelhetyeke nhenge Ngkartele-
kenhe arrpenhe areyeke, arrpenhele apeke
renhe irrerlknge atweme-ketye.

¹⁷ Artwe
apeke Ngkartele-kenhe aneme nhenge apwerte
ngkweltye akngerre-akerte mantere akngerre-
akerte-arlike, arne arunthe-akerte-arlike, nhenge
re apeke aremele arrpenhe nhenge Ngkartele-
kenhe-anteye nhenge angayakwe anerlunge
mantere-arlike atnyenetyakenhe renhe ipmentye
impemele. Kele nthakenhe-arle-ame re ilelheme

rarle Ngkarte-kenhe aneme-anteye? Arrangkwe, yanhe kwenhe urrtyrreme. Re apeke Ngkarteke ahentye aneme re kwenhe atnerte alhwarrpe awelhetyeke tyerrtye akunye yanheke renhe anthetyeke. ¹⁸ Kele anwerne arrakerte-ante ware akwetethe angketyale anaye, kele-anteyele anwerne itneke alhwarrpe aneme-tetye akwetethe itnenhe arntarnte-aremele.

Ngkarteke utnenge atnerrele angketyeke

¹⁹ Nhenge anwerne apeke akwetethe akangkeme anerlte-anemele arrpenhe areye arntarnte-aremele, anwerne alakenhe arratyte itirreme, “Angkentye Ngkarte-kenhe kwenhe arratyte anthurre aneme, anwerne-arle angkentye renhe arratyte itelaremenge, anwerne arratyte Ngkarte-kenhe aneme.” Nhenge anwerne apeke alakenhe itirremele, kele anwerne Ngkarteke utnenge atnerrele angkemele, atere-kwenye. ²⁰ Nhenge anwerne arne akurne mpwareke-arle iperre imerte itirrentye anwerne-kenhele anwernenhe ilpernerle-anemeke; araye, Ngkarte kele akaltye aneme itirrentye anwerne-kenheke, Re anwernenhe mwantye-mwantye-ileme. Re kwenhe anwerneke akaltye anthurre aneke. ²¹ Atyewe atyinhe areyaye, nhenge anwerne arne akurne mpwareke-arle iperre imerte itirrentye anwerne-kenhele anwernenhe ilpernetyakenhe, kele anwerne anteme Ngkarteke utnenge atnerrele angketyeke. ²² Nhenge anwerne Renhe arne iwenhe apeke renhe areyeke apayuthnemele, kele

Re anwernenhe antheme anwerne-arle mpwaremenge iwenhe-arle Re mpwaretyeke ilemeke. Anwerne iwenhe apeke renhe mpwareme Renhe akangkentye mpwaretyeke. ²³ The arrenhantherrenhe ileme iwenhe-arle Re anwernenhe mpwaretyeke uterneme: Anwerne kwenhe arratyte itelaretyeke Jesus Christ-arle Alere Ikwerenhe anemeke. Nhenge anwerne akangkelhe-ilerretyeke, arntarnte-arerretyeke anteye nhenge Rarle anwernenhe mpwaretyeke uterneke-arteke. ²⁴ Nhenge anwerne apeke awerlenge iwenhe-arle Re angkemeke ante mpwareme anteme kele imerte anwerne arratyte anthurre Ikwerenge anyente-irremele. Alakenhe-anteye-arle Re anwernekenge anyente-irreme. Re anwernenhe Utmenge Ikwerenhe antheke, yanhe-ngentyele anteme anwerne akaltye aneme Ngkarte apurte anwernekenge aneme.

4

Nthakenhe Utmenge areye alhengke-aretyeke

¹ Atyewe atyinhe areye, arrpenheme kwenhe alakenhe angkeme, “Utnenge Ngkarte-kenhe atnyeneme-arle, ayenge kwenhe angkentye nhenhe angkeme.” Nhenge renhe iparrpele arratyte itelaretyale, Ngkarteke-amparre alakenhe apayuthnaye, “Tyerrtye nhenhele-ame angkentye renhe ileme rarle Utmenge Ngkwihinhe atnyeneme apeke, re apeke utmenge arrpenhe atnyeneme?” Ngkarte apayuthneke-arle-iperre, kele imerte awemele angkentye renhe arrkernemele tyerrtye atningke-arle

kwenhe angkemenge, itne-arle akwele Utmenge Ngkarte-kenhe-akerte, apmere arrpe-anenhe-werne alherlte-iweke-arle, itne urrtiyirrerle-apeme angkentye akurne ilerle-apemele. ² The kwenhe arrenhantherrenhe ileme nthakenhe-arle alhengke-awetyeke akaltyele-anthenhe-anthenhe areye-arle Ngkarte-ngentyele apetyekenge: Tyerrtye angwenhe apeke arraty angkeme nhenge Jesus Christ-arle Ngkarte-ngentyele apetyeke tyerrtye anwerne-arteke anteme-irreke, re kwenhe angkentye Ngkarte-ngentyele akaltyele-antherle-apemele. ³ Kenhe arrpenhe areye akenhe akwetethe angkeme: Jesus Christ utmenge-arteke apetyeke, tyerrtye-kwenye. Nhenge Utmenge Ngkarte-kenhe itnenhe alakenhe angketyeke uternetyakenhe. Nhenge arrantherre apeke awemele arrpenhe alakenhe renhe-arteke angkerleng keke arrantherre itelaretyenhenge: Tyerrtye nhenhe kwenhe Utmenge Ngkarte-kenhele angketyakenhe, kenhe utmenge arrpenhe-akertele, Christ-ketye akengentye angkemele. Kele arrantherre-ingarle aweke-arle tyerrtye nhenhe areye-arteke urreke arratetyenhe. Kenhe the akenhe arrenhantherrenhe ileme itne-arle keke arrateke-arle tyerrtye areyenge apmere ahelhe nhenhele anemenge, tyerrtye nhenge areye Christ-eke akengentye angkeme.

⁴ Atyewe atyinhe areye, arrantherre Ngkarte-kenhe aneme. Arrantherre angkentye yanhe areye ipmentye-iweke arrpenhe areye-ngentyele nhenge arrentye-akerte-arle, arrantherre-arle Utmenge Ngkarte-kenhe-akerte, Re arrentye

Satan-enge akngerre anthurre-ulkere. Kele tyerrtye yanhe areye Utmenge Ngkarte-kenhe-kwenye arrenhantherrenhe uyarne akurne mpwareme. ⁵ Itne angkentye apmere ahelhe nhenhe-arenye-ante ware angkerlte-aneme, itne kwenhe akaltyele-antheme arne areye nhenge tyerrtye Ngkarteke akutne areye-arle awetyeke ahentye-anemenge, alakenhe ikwerenge anteme Ngkarte-kwenye areyele itnenhe aweme. ⁶ Kenhe anwerne kwenhe Ngkarte-kenhe aneme, nhenge yanhe areyele-arle Ngkarte arratyte itelareme anwernenhe awetyenhenge. Kenhe angwenhe apeke Ngkarte-kenhe anetyakenhe, re kwenhe anwernenhe awetyakenhe. Alakenhe ikwerenge anwerne akaltye aneme nhenge arne areyeke tyerrtyele-arle akaltyele-antherlte-anemeke nhenge arratyte apeke, nhenge urrtirrentye apeke, itne apeke tyerrtye areyeke-arle ularele ware ilerlte-aneme.

Anwerne arntarnte-arerreye, nhenge Ngkarte-le-arle anwernenhe arntarnte-areme-arteke

⁷ Atyewe atyinhe areye, anwerne kwenhe akwetethe arntarnte-arerretyeke, Ngkarte-le-arle kwenhe anwerneke imernerlenghe nhenge nthakenhe-arle arntarnte-arerretyeke. Nhenge anwerne-arle apeke arratyte arntarnte-arerremele anwerne kwenhe imernemele ampe Ngkarte-kenhe arratyte anemeke, Ngkarte arratyte itelaremele-anteye. ⁸ Kenhe tyerrtye nhenge mwantye-mwantyele anetyakenhele nhenge arrpenhe areye-arlike arntarnte-aretyakenhele re kwenhe Ngkarteke akutne-arle.

Ngkarteke kwenhe tyerrtye areye akwetethe mwantye-mwantye-ileme itnenhe arntarnte-arerle-anemele Re ampe Ikwerenhe areyeke ahentye-aneme alakenhe-anteye anetyeke.

⁹ The kwenhe arrenhantherrenhe ileme nhenge nthakenhe-arle Ngkarteke anwerneke imerneke Rarle nhenge anwernenhe mwantye-mwantye-ilerle-aneme: Re kwenhe Alere Ikwerenhe anyente-ante yerneke apmere ahelhe nhenhele anetyeke anwerneke ilwetyeke nhenge yanhe areyele renhe arratye itelareme kwenhe itethe akwete-ante Ikwerenge anetyeke. ¹⁰ Re kwenhe nhenge anwerne mwantye-mwantye-anthurre-ileke. Nhenge anwerne-arle Ikwere akutne anerrirretyarte akwetethe arne akurne areye mpwarerlte-anetyarte Ikwere ahentye anetyakenhe-arlike, Re anteme Alere Ikwerenhe yerneke nhenge anwerneke ilwetyeke. Nhenge re apeke ilwemele re kwenhe arne akurne urrpakeke nhenge anwerne-arle mpwarekenge, anwernekenge ipeltye-irremele. Alakenhe ikwerenge re imerneke Rarle anwernenhe mwantye-mwantye-anthurre-ileme.

¹¹ Atyewe atyinhe areye, Ngkarte-arle kwenhe anwerneke alakenhe-arteke ahentye-anerlenge, anwerne akangkelhe-ilerretyeke, arrpenhe areye mwantye-mwantye-ilettyeke, arntarnte-arerretyeke. ¹² Arrpenhele Ngkarte aretyakenhe-arle, kenhe nhenge anwerne apeke akangkelhe-ilerremele, kele anwerne imernemele Ngkarte-arle anwernekenge apurte aneme. Anwerne akwetethe mwantye-mwantye-ilerremele arntarnte-arerremele-anteye Ngkarte-arle

anwerneke mpwaretyeke ahentye anemeke.

¹³ Itelareme Ngkarte-arle anwernenhe Utmenge Ikwerenhe antheke-arle, kele anwerne itelareme anwerne-arle Ngkartenge apurte aneme, Re anwernekenge aneme-anteye.

¹⁴ Ngkartele kwenhe Alere Ikwerenhe apmere ahelhe nhenhe-werne yerneke tyerrtye ingkirreke anthurre itetheke mpwaretyeke. Anwerne kwenhe Alere Ikwerenhe areke arlte lyete anteme anwerne arrpenhe areyeke ikwere-akerte ilettyeke. ¹⁵ Tyerrtye angwenhe apeke arratyte angkeme, “Jesus kwenhe arratyte Alere Ngkarte-kenhe.” Tyerrtye yanhe kwenhe Ngkartenge apurte akwete anetyenhe, Ngkarte alakenhe-anteye Re ikwerenge apurte anetyenhe. ¹⁶ Anwerne Renhe arratyte itelareme, akaltye anemele-anteye Rarle anwernenhe mwantye-mwantye-anthurre-ilemele akwetethe arntarnte-arerle-anemele.

Ye, Ngkarte kwenhe akangkentye anthurre aneme. Nhenge anwerne apeke, atyewe Jesus-kenhe areye-arle, mwantye-mwantye-ilerremele kele anwerne apurte akwete-arle Ngkartenge anerlte-anemele, Re anwernekenge apurte akwete anetyenhenge. ¹⁷ Anwerne kwenhe arrpenhe areye mwantye-mwantye-anthurre-ilettyeke. Anwerne apeke alakenhe-arteke mpwarewarremele anwerne anteme Jesus-arteke anemele. Kele arlte ingkernenge nhenge Re anwernenhe Ikwerenge arrekwele ngkernemele tyerrtye ingkirreke akngakelhe-ilettyeke, anwerne Ngkartenge arrekwele tnetyenhe nhenge utmenge atnerre awelhemele. ¹⁸ Ye, Ngkartele-

arle anwernenhe mwantye-mwantye-ilerlenghe, anwerne kwenhe atere-kwenye anetyeke. Anwerne kwenhe Ngkarte-ketye atere-irretyakenhe aneme, anwerne apeke ikwere ahentye anthurre anemele. Kenhe arrpenhe areye-ingarle ikwere-ketye atere aneme. Itne kwenhe awetyakenhe Ngkartele-arle nhenge anwernenhe akwetethe mwantye-mwantye-ilerle-aneme, alakenhe anteme itne atere awelheme alakenhe itirremele, “Arlte urreke nhenge Ngkartele anwernenhe Ikwerenge arrekwele ngkernetyenhe anwernenhe akngaketyenhele anwernenhe anteme atwetyenhe nhenge arne akurne areye anwerne-arle mpwarekenge.”

¹⁹ Anwerne Ngkarteke akangkemele itirreme, arrpenhe areyeke Christ-arle arratye itelaremeke Ngkartele-arle kwenhe anwerneke mwantye-mwantye-ilekenge anwernenheke amparre arntarnte-aremele. ²⁰ Alakenhe ikwerenge anteme, nhenge angwenhe apeke angkerlenghe, “Ayenge kwenhe Ngkarteke akwetethe ahentye aneme,” Re kwenhe arrpenheke ahentye anetyakenhe Ngkarte-kenhe anemeke-arle, re kwenhe urrtirremele angkeme. Nhenge angwenhele apeke-arle arrpenhe Ngkarte-kenhe areye mwantye-mwantye-iletakenhe itnenhe arntarnte-aretyakenhele nhenge re renhe areke-arle, nthakenhe-arle-ame re Ngkarteke akangkemele itirreme nhenge Renhe-arle aretyakenhele aneke? ²¹ Itelareme, Christ-ele-arle anwernenhe alakenhe uterneke, “Nhenge arrantherre apeke mwantye itirreme Ngkarte-akerte, kele

arrantherre apeke kwenhe atyewe Ngkarte-kenhe arrpenhe areye arraty mwantye-mwantye-iletayeke arntarnte-aretyeke-anteye.”

5

Nhenge anwerne Jesus arraty itelaremele, kenhe arrpenhe areyele, apmere ahelhe nhenhe-arenye areye-arle, anwernenhe uyarne akurne-ileme

¹ Nhenge anwerne apeke arraty itelareme Jesus-arle tyerrtye anemeke Ngkartele-arle yerneke anwernenhe itetheke mpwaretyeke, kele anwerne tyerrtye areye-arle arraty anthurre-arle aneme anteme Ngkarte-kenhe ampe areye irreke-arle. Kele ingkirreke Ngkarteke ahentye aneme-arle, ampe Ikwerenhe areyeke-arlke ahentye aneme-anteye. ² Anwerne itelareme, anwerne-arle ampe Ngkarte-kenhe areyeke ahentye-anemele, anwerne apeke Ngkarteke ahentye anemele ingkirreke mpwaremele Rarle anwernenhe mpwaretyeke uternekenge. ³ Anwerne apeke Ngkarteke ahentye anthurre aneme, nhenge anwerne-arle angkentye Ikwerenhe aywerrkele awerlte-anemele, imerte mpwarerlte-anemele. Arrantherre apeke alakenhe angkeme-ketye, “Arrangkwe, angkentye nhenhe lterrke anthurre kwenhe anwerne uyarne mpwareme.” Kenhe arrangkwe-arle, angkentye Ngkarte-kenhe lterrke anetyakenhe, re kwenhe mwerre itelaretyeke, mwerre mpwaretyeke. ⁴⁻⁵ Nhenge anwerne apeke arraty itelaremele Jesus-arle Alere Ngkarte-kenhe, anwerne Ngkarte-kenhe

altye-irremele, Re anteme anwernenhe lterrike mpwareme, anwerne anteme aywerrkele mpwaretyeke iwenheke-arle Re ahentye anemeke. Alakenhe ikwerenge anteme yanhe areye-arle arne apmere ahelhe nhenhe-arenye areyeke-arle itirremele anwernenhe uyarne akurne-ileme, anwernenhe uyarne untyeme-ileme iwenhe-ketyenge Ngkarte ahentye-anemeke. Ngkartele anwernenhe lterrike anthurre ileme anwerne-arle Jesus arratyte itelaremenge.

Ngkartele Jesus Christ anwerneke imerneme

⁶⁻⁸ Ye, arrantherre itelareme nhenge Jesus Christ-arle apmere ahelhe nhenhe-werne apetyemele tyerrtye-irreke, arrantherre itelareme nhenge rarle amangkekonge John-ele renhe kwatyeke akwerneke baptise-eme-ilemele. Arrantherre itelareme urreke-arle re nhenge ilweke alhwe ikwerenhe thelelhomele anwerneke. Anwerne nhenhe itelareme Utnenge Akngerrele-arle anwerneke imernekenge, Re anwernenhe angkentye arratyte-ante ware akaltyele-antherle-aneme. Ye, Utnenge Akngerrele-arlike, kwatyele-arlike alhwele-arlike kwenhe anwernenhe akaltyele-antheke. Alakenhe ikwerenge anteme anwerne itelareme Jesus Christ-arle apetyeke anwerne-arteke, tyerrtye-irremele akweke inteke-arle, anwerneke piwelhomele ilweke-arlike. Alakenhe renhe-arteke Ngkartele anwernenhe akaltyele-antheme.

⁹ Nhenge tyerrtyele anwernenhe arne iwenhe apeke renhe akaltyele-anthemele, kele anwerne renhe arratyte itele-arle-areme. Kenhe nhenge Ngkartele anwernenhe arne iwenhe apeke renhe akaltyele-antherlenge anwerne-arle Renhe arratyte itelareme anthurre nhenge iwenhe-arle Ngkarte angkemenge kwenhe arratyte akngerre anthurre-ulkere nhenge iwenhe-arle tyerrtyele angkemenge. Ngkartele kwenhe nhenge anwerneke Alere Ikwerenhe imerneke alakenhe angkemele, “Nhenhe kwenhe Alere atyinhe.” Anwerne kwenhe renhe arratyte itelaretyeke anthurre. ¹⁰ Kele anteme, angwenhele apeke re Alere Ngkarte-kenhe arratyte itelareme, re itelareme-anteye iwenhe-arle Ngkarte Alere Ikwerenhe-akerte angkemeke. Kenhe angwenhele apeke arratyte itelaretyakenhe iwenhe-arle Ngkarte angkemenge, kele re kwenhe angkerle-aneme Ngkarte-arle urrtirremele angkemeke-athene, rarle untyeme-arle-irreme iwenhe-arle Ngkarte angkeme-ketye Alere ikwerenhe-akerte. ¹¹ Nhenhe kwenhe Ngkarte-arle angkeme: “The kwenhe alhileke, arrantherre-arle itethe akwete-ante anetyenhe!” Anwerne kwenhe itethe akwete-ante anetyenhe nhenge anwerne apeke arratyte itelareme Alere Ikwerenhe ilwekenge-arle nhenge anwernenhe itetheke mpwaretyeke. ¹² Kele anwerne apeke Alere Ikwerenhe arratyte itelareke-arle, anwerne itetheke aneme, nhenge anwerne apeke renhe ikwele-areme kele anwerne itetheke anetyakenhe.

Anwerne itethe akwete-ante aneme

¹³ The pipe nhenhe arrekatherre intelhe-ileme nhenge Jesus-arle Alere Ngkarte-kenhe arratyte itelareme areye-arle, arrantherre itelaretyenhe arrantherre-arle itethe akwete-ante anetyenhenge. ¹⁴ Yanhe ikwerenge anteme anwerne Ngkarteke utnenge atnerrele angkeme, Re anwernenhe aweme anthurre nhenge anwerne renhe arratyentye apayuthnerlenghe nhenge arne iwenheke apeke renhe Rarle ahentye anemeke Renhe akangkemele mpwaretyeke. ¹⁵ Kele imerte anwerne itirretyenhe, “Ye, arratyte-arle nhenge anwerne Renhe apayuthnerlenghe, Re akwetethe aweme imerte mpwaremele.”

¹⁶ Nhenge unte apeke arrpenhe areme Jesus-kenhe aneme-arle akurne mpwaremenge. Areke-arle-iperrele unte kwenhe Ngkarte apayuthnetyeke renhe itetheke mpwaretyeke, renhe itethe akwete-ante atnyenetyenhenge. Kenhe tyerrtye arrpenhemele akenhe arne akurne anthurre mpwarerlte-aneme itne-arrpe nhenge Ngkarte-ngentyele akngakelhe-ilelhomele akwete-ante anetyeke. Nhenge arrantherre apeke arrpenhe arerlenghe akurne anthurre alakenhe-arteke mpwarerlenghe, Ngkarte apayuthnetyale renhe nhenge itetheke mpwaretyeke. ¹⁷ Tyerrtye ingkirrekele akurne mpwareme-arle itne Ngkarte-ketye akurne mpwaremele. Kenhe arne arrpenheme akenhe anwerne-arle mpwareme, itne anwernenhe Ngkarte-ketyenge akngakelhe-iletakenhe akwete-ante anetyeke.

¹⁸ Kele nhenge anwerne itelareme atyewe Ngkarte-kenhe areyele-arle arne akurne

akwetethe mpwaretyakenhe aneme. Alere Ikwerenhele kwenhe anwernenhe akwetethe arntarnte-arerle-aneme, anwernenhe akayake-ilemele arrentye Satan-ele anwernenhe rakeketyenge.

¹⁹ Anwerne kwenhe itelareme anwerne-arle Ngkarte-kenhe aneme Re nhenge anwernenhe akwetethe arntarnte-arerle-anemeke akwetethe anwernenhe akayake-ilerle-anemele. Anwerne itelareme-anteye, arrentye Satan-arle pwathe anemeke tyerrtye nhenge areyeke-arle arne apmere ahelhe nhenhe-arenye areyeke-ante ware itirrerte-anemeke.

²⁰ Anwerne kwenhe itelareme Alere Ngkarte-kenhe-arle apmere alkere akertne-ngentyele anwerneke-werne apetyeke, anwerne itelareme-anteye rarle anwernenhe akaltyele-antheke nhenge nthakenhe-arle itelaretyeke Ngkarte-arle arraty anemeke. Kele lyete anteme anwerne Ngkarte arratyenge anyente-irreke-arle, anwerne-arle Jesus Christ Alere Ikwerenhe-kenhe aneme. Jesus Christ kwenhe Ngkarte arraty aneme. Re apele nhenge tyerrtye areye itethe-ileme-arle akwete-ante anetyeke.

²¹ Ye, ampe atyinhe areye, arrpenhemele kwenhe arne arrpe-anenhe mpwareme arne-ngentyele apwerte-ngentyele-arlike itnenhe tnakemele. Kenhe arrantherre akenhe itnekenge apurte-irretyale anetyeke arne nhenge areye tnaketyeke, arne yanhe areye arraty anetyakenhele, urrtyrrentye ware-arle. Kele itne-ketye arlenge anetyeke, Ngkarte-ante ware akertne tnakaye.

Kele alakenhe ware.

Angkentye Mwerre
Portions of the Holy Bible in the Central and Eastern
Arrente language of Australia

copyright © 2002-2014 Wycliffe Bible Translators

Language: Eastern Arrente (Arrernte, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 11 Nov 2022 from source files dated 22 Nov 2019

26bd077a-984c-5596-a099-f37f2651f363